



Nunatsinni tamani utoqqaat ulluisa pilersaaruserfigineqarnissaannik siunnersuut apeqquteqaat aallaavigalugu oqallittoqarnissaannik siunnersuut tamatumuuna saqqummiuppara.

(Inatsisartunut Ilaasortaq Hans Enoksen, Partii Naleraq)

Inatsisartunut ilaasortap Hans Enoksenip, Partii Naleqqamiit apeqquteqaat aallaavigalugu utoqqaat illuisa pilersaaruserfigineqarnissaat pillugu siunnersuutaanut qujalluta imannak oqaaseqarfigissuarput.

Inatsisartunut ilaasortap Hans Enoksen-ip apeqqutit pisariaqarluinnartut oqallisissiarai, tassami aamma siunissami utoqqaat pitsaasumik toqqissisimanartumillu inuuneqarnissaannut qulakkeeriffigineqarnissaat pisariaqarluinnarmat.

Tassami Partii Naleqammi anguniakkatta pingaartut aamma ilagaat, utoqqartatta ernumassuteqarnatik nuannaarlutik toqqissisimallutillu utoqqalinissaat assut pingaaruteqarmat.

Taamaammat aamma assut pingaaruteqarpoq utoqqartatta qaqugukkulluunniit nammineersinnaanerup killeqalerneratigut nammineq piumasaq naapertorlugu utoqqaat illuannut nuunnissamut periarfissaqartuarnissaat pisortaniit qulakkeersimaniartariaqartoq Partii Naleqqamiit isumaqarpugut.

Soorunami Partii Naleqqamiit aamma ataqqivarput utoqqaat sapinngisamik sivilunerpaamik nammineq najungarisami najugaqaannarsinnaanerat.

Taamaattoqartillugulu pisariaqarpoq utoqqaat pitsaasumik nakkutigineqarlutillu sullinneqarnissaat aamma qulakkeersimaneqartariaqarmat.

Taamaammat aamma utoqqaat toqqissisimasunik atugassaqartinneqarnissaasa pilersaaruserfigineqarnissaat eqqarsaatigalugu Partii Naleqqamiit ilanngullugu oqaatigissuarput, soorunami utoqqaq nunaqarfimmiippat imaluunniit illoqarfimmiippat, inunnik isumaginninnikkut

periarfissat atorlugit pitsanngorsaajuarnissat pisariaqarluinnarmata, kommunit aamma utoqqaat peqatigiiffii, utoqqaallu kattuffiat qanimut suleqatigalugu pilersaarusiernerit ingerlanneqartariqartut isumaqarpugut.

Tassami Partii Naleqqamiit isumaqarpugut utoqqarnut atugassarititaasut sutigut tamatigut pitsaanerulersinneqarnissaat sulissutigineqartuartaqartut.

Pingaartumik utoqqaat nunaqarfinni isorliunerusunilu utoqqaat illoqanngitsuni isumassorneqarnerat ilaatigut pitsaanerpaajunngitsoq tusartarparput, pingaartumillu kommunerujussuarni aningaasaqarnikkut ilungersunartorsiorfiusuni.

Takorloorsinnaavarput ukioq-manna nunarput tamakkerlugu issittorujussuuvoq, annerusumik nunatta avannaani.

Nalunngilarput aamma nunaqarfinni isorliunerusunilu illorpassuit aserfallassimaqisut aamma ilaatigut utoqqarnit najugarineqartut. Issi, taaq avannaanilu kaperlak eqqarsaatigissagaanni utoqqaat ilaat inigisap kiassarniarneranut ilaatigut assorujussuaq ajornartorsiuteqartarput, tamakkulu pitsaasumik kommunimiit ikiorserneqanngikkunik soorunami ilaatigut ilungersunartorsiorneq imaannaanngitsoq atukkanut oqimaareertunut suli annerusumik artukkiisartoq tusartarparput.

Taamaattumik utoqqartatta ilaasa pisariaqartitsineq naapertorlugu utoqqaat illuinut nuussinnaanerat pilersaarusiorkuakkamik piareersarneqartariaqartoq Partii Naleqqamiit isumaqarpugut.

Taamaammanuna aamma utoqqarnut ukiuni tulliuttuni Naalakkersuisut 100 million koruunilikkaanik sipaaruteqarniarnerat Partii Naleqqamiit akuersaanngilluinnaripput.

Taama naakkaluamik oqallisissiaq Partii Naleqqamiit isummersorfigaarput.